



San 18nan - Zuluyekalo - san 1990  
A songo : DOROME 10 - N° 222

# kibaru

a bè bò kalo o kalo "AMAP" ka yamaruya kònò

**denko ... denko !**

denladonbaliya  
ani  
kalanbaliya



kelew be  
musow de bolo  
(a be ne 8 la)

# Ka bo Mali balikukalan baarada la "DNAFLA"

## Balikukalan yiriwali

Ne Bakari Jara, ni dɔw ko Bakaribilen diyo bamabugu. An bε don min na ko bi ne bε Mali nɛmɔgɔw fo u ka baara la, n'ɔ ye balikukalan jɛnsenni ye cikɛbugudaw la. Ne ye san 5 kε balikukalandenya na.

An bε don min na ko bi, ne kera balikukalan karamɔgɔ ye diyo bamabugu.

Ne bε Mali nɛmɔgɔw bεe fo, k'a d'a kan, ne ma tile kelen kε tubabu kalan na.

Nka an bε don min na ko bi ne kera balikukalan karamɔgɔba ye k'a sababu kε Mali nɛmɔgɔw ka cesiri ye.

Ne bε don min na ko bi, ne hamina ko ye kalan ye bawo, kalanbaliya ye dibi ye dε.

Ne b'a nini an balemw fε bεe k'i cesiri. N'a fɔra ko bεe k'i cesiri hakilitan dɔ bε taa jurukise ta k'a cesiri.

O ko te.

N'a fɔra, i cesiri faso jo baara de ko don. Malidenw, an ka hamikera, k'an bo dibi rɔ.

Aw yere ka laje sal! Fɔlo ni sogo tunfagara, an ka cikɛdugu kɔnɔ, o sogo tun bε sara da hake dɔ la. Sara hake min dara, o kala hake fana tun bε ta.

An bε don min na ko bi, o kε

dugu dɔgɔyara, k'o sababu kε kalan ye. Balikukalan bε kε sababu ye ka dinɛlatige nɔgɔya an bolo. ne ka foli bε ka taa Mamadu Sanɔgɔ yɔrɔ Kati.

**Bakari Bilen JARA  
balikukalan  
karamɔgɔ diyo-bamabugu  
Kati Zafu kɔnɔ.**

## Balikukalan yiriwalisira

Ni kantε sεben a bε to nimakaran-na ka sa.

Nbalema fasodenw, Kalan suguya ka ca, nka fasokan kalan nɔgon te. Balikukalan ye kalansen kura ye Arabukalan ni Tubabu kalan kɔrɔ. A bε mɔgɔ caman kɔnɔ k'a dabora sɛnɛkelaw ni kunfin wɛrew laki-lanni de kama, a n'ɔ yɔrɔ ka jan. E min kalannen bε kan wɛre la min ni fasokan te kelen ye, kerenkerenneny la e Tubabukan kalanbaa, lakɔlikaramɔgɔ, dɔgɔtɔrɔ, kumandan, birokɔnɔ baarakela, lakoliden kɔrɔ, aw bεe k'a w jija ka balikukalan in dege kɔsεbe, n'ɔ ma kε, aw na kε kunfin kɔrɔw ka kunfinw ye dε!

Bi-bi-in na, sɛnɛkelaw bε se k'u hakilinaw sεben k'a ci aw ma fasokanna, aw tεna se k'a kalan, kuma te ka faamuya sɔr'a la; o tuma, jɔn

kera kunfin ye aw la? Jɔn ye fasokan kanubaa juman ye aw la? Lɛmɔgɔ, politikilɛmɔgɔ, e kalan-na balikukalan in na wa?

N'i ma kalan a la, i bε mun kɔnɔ. N'i kalann'a la, i ye mɔgɔ joli bɔ i nunma?

I ye fεerε jumen laben i ka kafo kɔnɔ walima i ka kin kɔnɔ walasa kalan in ka se ka sira sɔrɔ? Farafinnadenw, kerenkerenneny la Malidenw bεe b'a dɔn ko: walikan diya o diya a te yerekan bɔ abada!

An ka bɔnɔgɔla, an ka nɛtaa, an ka sɔrɔ yiriwali, an ka yeremahɔrɔny a sabatili, ninnu si te se ka nɔgɔya an ma k'an to walikan kan.

O tuma, an bεe k'an jija balikukalan in na, fasokan kalan in na, yereðɔn kalan, yeremahɔrɔny a lakika kalan, haminankow nɔgɔya kalan in na. Mɔgɔ jugu t'i yere ye dε?

Kan sεbenbaa mana caya, hakili jagabɔbaa bε caya a kɔnɔ sɔrɔ yiriwali ni fen kura bange nɛtaa siratige la; ko kɔrɔ nafamaw bε nɛnɛmaya, kuraw bε sinsin.

Bamananw ko:

si ka gelen ni siyɔrɔ ye; ni Alasɔnn'a ma, farafinna dibifin, Mali dibifin n'a ka jamana yiriwabaliya bε ban pewu k'a sababu kε fasokan kalan in ye.

**Mukutari DANBELE  
lakɔlikaramɔgɔ  
ka bo sabalibugu «A»  
Bamako ( Mali )**

# Yiriwalikow ani netaakow bilasirali walew

## Kunnafoni

Karidon, zuwenkalotile 24 san 1990 njogonlajeba do kera Bamako kafo duurunan bololabaarakelaw ka tonba fe, u ka baarakesoba kono.

O lajeba in kera kafo nemogo caman nena, k'a damine sekison nemogo la, k'a bila depite ni ciden kerenerennen minnu be kafo kunna, kalanso nemogoca man ani mogo werew.

Bamako kafo duurunan bololabaarakelaw ka nin lajeba in dabora fen nafama saba de kama.

Folo: Ka ton in bo dogo la wala sa mogo caman k'a sidon, ka ke sababu ye ka jekabaara yiriwa jamana kono

Filan: Ton in donnenkojama fe, o jama kelen in ka ke sababu yek'a kibaruya jensen kafo kono folo, Bamako kono ani jamana fan tow la.

Sabanan: Geleya damado minnu b'u kan, fura ka nini olu la, bawo Bamanan ko: jeges fanga ye ji ye; jekafye daamu ye, nka jekabaara njogon daamu te.

Bamako kafo duurunan in bololabaarakelaw ka ton ye tonba bolofara ye min bangera san 1982 kafo sabanan kono.

B.I.T. n'o ye dunuya kono baaratona sun ye, ale ni Mali kono baarakeminisirisoba de jera ka ton nin sigi sen kan.

Bi-bi-in na, a ton in njogon be Bamako kafo bee kono fo kafo folo; ton in njogon be Segu, Kolokani ani Tonbutu.

An be kafo duurunan in min bololabaaraketon ka kuma la, ton in y'a yere ta san 1985, a sun be sabablibugu ni Bakojikoroni ni njogon ce.


Bololabaarakela nana mogo keme ni ko b'a ton na; baara suguya tan be k'u fe, i n'a fo: sojo, jirisi, mobilitilan, kalali, negebaara sugu o sugu ani fen werew.

Musow ka baara fana be yen in'a fo: kalali, galadon, segedilan n'u njogonnaw.

An b'aw ladonna ko degeden mogo keme ni bi saba be ka baara dege ton in kono.

Bololabaarakelaw ka ton nemogow kelen ka kuma ta, k'u hakilina jira, nemogo tow ni mogo welelenw na; bee ye faamuya soru kumakanw kono, ka hakilina kuraw soru la.

A jirala ka fo nin ton in ye bee je ye ka d'a kan, fasoyiriwalisira do don cogoya bee la.



Mukutari DANBELE

Jekabaara ni denmis en cema n'a musoma ladegeli baara la, ani baarako njogoyali fasodenw ma.

Njogonlajeba in kunceyoro la sa: politiki nemogow ni kafo kono ciden kerenerennen, ni lakolidensomogoton nemogo, bee y'a kalikan di u seko n'u donko baara la ton in ka netaa n'a ka yiriwalisira la.

Bololabaarakelaw fana y'u kan di baaraw kecogonuman na bawo baara kecogo de b'a mankutu./.

**Mukutari DANBELE**  
Iakolikaramogo  
ka bo sabalibugu «A»  
Bamako (Mali)

## Ka bo sabalibugu

Nin tun ye jarake do ye,  
A menna cegananya la kosebe;

A balima togolaw ni kemenaaniw niii..... u ka ca.

Olu bee hamina ka jore.

Don do, a terike son jalen k'a ma:

Ce!! i ka musoko in geleyara sa koyi !!

Jarake y'i kanto: Ee ce! ni Ala sonna a ma, n ka musoko hamie ban sisan, barisa n koreke degunnedba don bana bolo.

**Mukutari DANBELE**  
Iakolikaramogo ka bo  
sabalibugu «A»  
Bamako (Mali)

# Kibaru kanubagaw n'a

## Maana

Nin kera kamalen saba ye, u si te si dɔn.

Kelen taara muso furu dugu dɔ la.

Kelen wɛrɛ seginna ka taa o muso kelen furu tuguni. Sabanan fana taara muso kelen in furu tuguni.

Kamalen saba in taara ni sannifɛn ye sugu la.

U bɛɛ ta sanna dalasi baa kelen tuma min, u bɛna taa so laansara .

U taatɔ la, kelen nana luneti sɔŋɔn nininka.

Lunetitigi ko dalasi baa kelen ce ko e ! dalasi baa kelen ka ca. Lunetitigi ko, i te luneti in kalamā dɛ.

N'i y'a don i ne la, i b'i jolen to ka dijɛ seleke naanin bɛɛ lajelen ye.

Ce ko aa ! O b'a san kun bo. Ce in ye dalasi baa kelen don luneti la. Kelen fana nana nebo bagi fini kura dalen fe.

Ce ko bagi fini ye joli ye, finitigi ko dalasi baa kelen .

Ce ko, k'o ka ca, finitigi ko kɔni nɛnɛ wuli t'i la n balimake.

Jalo y'i ye wa?:

N te fula ye.

Nin fini n'i b'a fe ka taa dugu la, walima jamana dɔla, ib'a fenseñ

dugukolo kan, k'i sigi a kan. A bɛ pān n'i ye i ko pankurun. Ce ko aa ! o b'a san kun bo. Ce in y'a ka dalasi baa kelen ke k'o san.

A sabanan neborɔ pomati tulu fe, ce in ko: pomati ye joli ye? pomatitigi ko: dalasi baa kelen. Ce ko dalasi baa kelen ka ca. Pomatitigi ko; kɔni e bɛ tulu in kalama?

Ni y'a dɔoni ce mɔgɔ salen nun kɔrɔ, o bɛ tiso, ka tiso fo siŋɛ saba n'a mɛɛna, a tigi bɛ wuli k'a sigi.

Ce ko aa ! o b'a san kun bo. Ce ye dalasi baa kelen ke ka tulu san.

U bɛna taa so nanfan. Lunetitigi ko a' y'aw jo tan, ne ka n ka luneti don k'a laje, ni kuma ye tiŋɛ ye.

A ye luneti don a ne la, ce ye fan bɛɛ lajelen ye, a sinna k'i kanto ko ce, an bɛ ka muso min furu a su file mɔgɔw bolo ka taa kaburu la. bagitigi nan'a jo.

Ne fana ka n ta laje, ni tiŋɛ ker'a ye.

O y'a ka bagi fenseñ k'u sigi a kan.

A panna n'u ye i ko pankurun. U taara mɔgɔw kɔn kaburu la, u y'u sigi k'u kɔn.

U nana ni su ye, tulutigi ko a y'aw jo ne ka n ka tulu laje ni tiŋɛ

don. A ye tulu dɔɔnin ke a nun kɔrɔ.

A tisora ka wuli k'i sigi jama jolen kabakoyara.

Ko yala. muso ka kan ka di ce saba in dɔ la kelen jumen ma?

Usumani KAMARA  
kalanden jolen  
Bamabugu Katı mara la.

## Kabako

A tun bɛ n kɔnɔ ko n tulo bɛ n fakan na,

Cogo min a ka nɔgɔn o cogo la, n'o ye bamanakan ye.

A tun bɛ n kɔnɔ a kalanni n'a sɛbenni fana bɛ o cogo la,

Nka ne kabakoyara, kabini ne ye bamanankan kalan ke,

Ne ye fɛn caman ye ka caman faamu,

Ne ne yelɛla ka n bo fili la,

Ne nisɔndiyara Ala ni karamɔgɔ numan (...),

Ka bo balikukalan baarada la Bamako

O tuma, n badenw, Malidenw, an bɛɛ k'an jija

ka balikukalan ke

i ye tubabukalan ke wo,

i ye larabukalan ke wo,

siya bɛɛ kelen-kelen, i ka kan,

o nafa b'i kan kosebe.

Siri Mace KEYITA  
ka bo nakɔ ni jiriforotigiw ka  
koperatiwu la katı (Mali)

# kalanbagaw kuma yoro

## Musotigela

Nin kera-ce do ye. A ka walimusotigela tun ka bon kosebe. Don dola, a y'a kunko fo walimuso do ye.

Muso in ma son ka jaabi numan d'a ma. Nka, o si ma ce in fara muso la. Komi a ma son ka fara a la, muso y'a nefo a furuke ye. Furuke y'i kant'a ma, n'a sorola ben be aw ni pogon ce, ce nin nt'a soroc k'a min, nka, ni ben te aw ni pogon ce, nb'a soroc k'a min

Muso ko ayiwa. I b'i yere ke dugutaala ye i mana taa, n be t'a fo ce in ye k'i taara dugu la. N'o kera, ce nin, i b'a sorobi. Furuke taara min ke, muso ye ci bila walimusotigela in ma k'a be se ka na o don sufe. Su kolen jarake nana walimuso ka so. O y'a soroc muso ce nana i dogo so were kono.

Musotigela nin nalen, muso y'i kanto a ma, i ka finiw bo. Musotigela nin y'a ka finiw bo k'u dulon musoke ka fini dulon yoro la. Okera min ke, muso y'i kanto a ma, n kono, n bena negen na. Muso y'i to o senfe, ka taa a ce wele. Musotigela y'a ka fini bee cun yoro min na, muso ce nana da yele. Dayelen ani musotigela in ka wuli k'i jo, o

si ma koro ni si ye. Gosili min kera ka bama bo ji la, a de dara ce in kan? N balimaw, an ka fara walimusotigela. Bamananwko: «anw ta, ani ne ta, u te kelen ye de». Ne ta de pogon te. Forobafen kera cogo o cogo, mogo kelen te se k'i sago k'a la.

Mamadu SANOGO

Zafukuntigi

kat

## Dumunidenw

Nin ce fila bee fa y'u gen k'u ye fugari ye ka dege ke u kun. Olu fila nana pogon tomo dugu kono. U y'u genkun fo pogon ye. U ko k'u ka taa pogon fe jamana kono. U taara ka taa ka taa U segennen, u y'u sigi yoro do la k'u bena u ka dege min. Ce kelen tora dege kunna, kelen do bilala k'o ka taa ji soli ka na u ka dege nonni. Jisolila taatola be k'i kofile to kelen do la, a be k'a fo: «N'i y'a dun, n ne b'i la, n'i y'a dun, n ne b'i la», fo ka t'a talon k'a bin ba la k'a faga. Okelen, to kelen do wulila k'ale yere be taa ji soli ka n'a nonni, o taatola jisolila, nsongsan do nan'a sen bila dege la. A ye jisoliminan fili ka nsongsan gen k'a gen, a bolito be k'a fo: «N kono n ka n ka dege non ka bo i sen na». A kunna

nsonsan na tuma min, a ye nsonsan sen bila a da kono k'a be dege non ka bo a la, nsonsan y'i sen soori ka don a kan kono fo k'a faga. Okelen, muso kono ma do kungoyaalato bor'o dege sigilen kan. O ye dege in min, k'a min fo ka taa den wolo o degeminan kunna. Muso in ye den in ta k'a bila degefilen kono k'i nyun k'a be taa so. Den in ye filen saani k'a saani k'a ban fo ka taa se ba kunkolo ma. N balimaw, nin mogo naani na joni kelen ka dumuniko ka bon?

Fatumata TARAWELE  
Katikoro (Mali)

## Nsiirin:Bakoronnin ani surukuba

Don do la, Bakoronnin n'a denw taara u yaala kungo kono. San finhen monimoni, bakoronnin n'a denw bolila k'u be taa san lamine so kono. U taar'a soroc suruku b'o so kono. bakoronnin siran kojugu suruku ne a y'a fo: «N koro suruku, kabini ne denw wolola u ma togo. O diya kojugu suruku ye, a y'i kanto: «Bataramo, kabini e denw wolola, olu togo ma da? A dimina k'ikodon. Okelen, bakoronnin y'a denw bil'a ne ka taa suwe. Surukuba sago selen, a y'i kanto: «kelen di yan, n k'o togo. Mogo ma kuma. Ay'ikofile, a ma foyi ye, a dimina ka boli ka boli, a ma bakoronnin n'a denw ye, a seginn'a ko.

Suruku kera cogo o cogo, a ka nalomaya te bo a la.

Hawa JAWARA  
Kati kura (Mali)

# Seko ni donko

## Bi musow ani bi cew

Ee mögolu

Cew mana wuli ko musow man ni.

Musow mana wuli ko cew man ni.

Ee mögolu

Bi musow ko «cew nogon fitiriale belebelew te».

Bi cew ko: «musow nogon kalabaganci te dijé kono».

Unenw ka di i n'a fónumuw ka notigemuruw da.

Jon ka ni sa?

Bi musow man ni,

bawo, bi musow ka nanama-nanama ka bon! Uté sira kelen ta.

U be nogon ka furu tijé suga sira fe.

Ee bi musow

A' ye sabali de !

Bamananw ko: «i b'a dón k'i be se ko bée la, nka i b'i to to».

Muso kera jiné ye cogo o cogo A be laban ce de bolo

Ee mögolu !

Aw kana ke sababujugu ye : minnu be furu labato minnu ye somusow ye

Ee mögolu !

A' kana aw mögöncöng su ka

bila sirajugu kan.

Bi musow mana sigi, n ce te foyi na nyé. U be wuli ka sabara kura san ka sirajanw miné

Ka don bölonniw fe

Ka don bölonbaw fe

Nka, n'o sabara ma fara sigiyoro t'u bolo  
jyoro t'u bolo

Ee mögolu

A' ye sabali de

Ceko kera cogo o cogo

O ma se sirajan taama la

Oma se a'ka nogon ta tijé aw ka dijélatige kono.

Bamananw ko: «sabali, munu, miiri ani taasi, o de ye muso togo ye. Muso fen o fen be nin kewalew bée fa, o ka dijélatige be nogoya. O tigi fana be ke sababu ye ka furu caman tugu. Sabu : bamananw ko : «miiri de be no ke dolo ye».

Mamadu SANOGO  
Zafukuntigi Kati (Mali)

## Maana

Don do la, anw tun be baara la. Baara wusulen, muso do nana anw ma ko anw k'ale bila sira.

Muso tun be taga dugu la. Dugu in tun yoro ka jan dooni.

A tun be kilometere 5 bo.

Muso in jinigalen, mun b'a to e te

se ka taa i kelen na? Muso ko: ne y'a men ko waraba be kungo bolo in na. Anw kono ganna, ka soro fen ngoni te anw kono. Anw ye hakiliw munumu-nun ne te se ka muso in ta moto la bawo den körba b'a ko la, taji fana songo ka gelén.

Bee jolen tora. ne taara so kofe, ka bélé ta, k'o di muso in ma. A di to, ne ko: ka bélé 3 in to i bolo, ni ala sonna fen te se k'i soro yanni dugu in ce. Muso in ye bélé siri tafe kun na ka sira miné. Tow ko, jaa i be fura dón, e ye cekoroba den ye, ka soro ne te fen dón.

Natuye BUGUDOGO  
BP: 89 Bamako (Mali)

## N ka kalimu ko di ?

N ka kalimu ko tinyé;  
Tinyé ye mun ye ?

Tinyé ye min bë;  
Mun bë ?

Fèn bëe bë,  
Fèn tè min tè :

Yeta bë,  
Yebali bë,

hakilinata bë,  
Miirinata bë,

Farikoloma bë

Wa farikolontan fana bë

Min tè o tè ye,

Min tè o tè dogo,

Min tè o tè da hakili kan,

Miiri kan,

Fèn bëe ye tinyé ye,

Nkalon yérè ye tinyé ye,

Sabu nkalon bë;

Fèn bëe bë,

Hali min tè o bë.

Sumana KANE  
Balikukan karamògò  
Balikukan baarada  
Bamako ( Mali ).

# Jirali kene

## Kuma koroma

Fèn dò bè dinyè kònò, n'i y'i ka suman kalifa a la, a kèra suman suguya o suguya ye, n'i mago ser'a ma, n'i k'i bè t'a minè, a b'a fi ye ko fò n'i y'i sagon ale su kunna, ko n'o tè, i ka suman tè sòrò. O ye fèn jumèn ye, n balimaw ? N bè foli kè ka nyèsin Mama-du Nyama Jara ma, ka foli kè Baba Jara ye, ale ye sènèkèla ye Jumazana Cènin, a n'a terikè, n'o ye Soliba Ture ye, Cènin.

Burama FONBA  
animatèri ka bò Jumazana  
Faana (Mali).

## Kelenya

Minnu ye kuntilenna kelen ye  
Minnu miiriya ye kelen ye  
Olu ka fara njogon kan  
kene kelen kan  
Olu ka ke kulu kelen ye  
O ka kan  
O ka ni kosebe!  
Minnu fililen njogon ka tijé ma  
Minnu ne tana ye njogon ye  
Olu bëe ka taa u ka fan  
N'i ko balawu kana wuli  
Sabu jikalaman fila te njogon  
sogi.

Nka nin bëe n'a ta o ta  
An kan'an kodon njogon na  
An k'an njemunu njogon ma  
An ka je ka dòn da kelen fe  
An ka je ka bë da kelen fe  
Kelenya togo la  
N'o kera  
An bë hadamadenya diyabo!

Dawuda Moriba keyita  
BP 1629, Bamako, Mali

## Je-ka-fô

Je-ka-fô ye daamu ye  
Je-ka-fô te yorô min  
Njogonfaamu te yen  
Njogonfaamu te yorô min  
Bén te yen  
Bénbaliya bë yorô min  
Njogonkanu te yen  
Njogonkanu te yorô min  
Hine te yen  
Hine te yorô min  
Hadamadenya te yen  
Hadamadenya te yorô min  
Bone ko  
Jahadi ko  
Hére te yen  
Ayiwa n badenw  
An t'a laje

Dawuda Moriba KEYITA  
BP1629, Bamako (Mali)

## Kuma koroma

Ko fèn kelen bë dijé na, n'a bange-ra moggò o moggò, ka du kònò, a te to dun a te ji min.

Nka fèn in a balo ye tasuma de ye  
Ni tasuma banna fèn in na, a bë sa  
wa du bë ci

Yala o ye mun fèn ye ?

O temenen kò ne bë foli ani tanuni  
ke ka taa balikukan lèmoggò bëe  
lajelen ma, sabu buguninakaw ye  
negeso soro balikukan na ani fèn  
caman wèrew;

o kera nisondiyaba ye buguninakaw fe.

Ala ka balikukan taa jè.

Bajan TARAWELE  
Bugunina animatèri  
Bananba (Mali)

## Kuma koroma

Dunankè kelen bë dinyè  
kònò, don odona bë fò a ma ko  
dunan, moggò o moggò man'a  
ye, a bë kè i bolo dunan ye; a  
ma dugulanya don si . Nka  
dunan in, n'a bë jigin dugu  
kònò, a bë jigin dugumoggò  
bëe kan, a tè sòn ka jigin moggò  
kelen kan dugu kònò.

Yala o ye dunan jumèn ye ?

Amadu SUNKARA  
Kapala Molobala, kucala  
(Mali).

# denladonbaliya ani kalanbaliya kεlew bε musow de bolo

## denko ... denko !



Denwolo ma fo. Denladon de fo. A ladon konuman ! Min ka gelen n'a wololi ye. Muso caman bε den wolo, o t'a tōnō dun. Mogo wεrε t'a dun. Kuma tε dugu ma. Kuma tε kafo ma. Kuma tε jamana ma. Mun na ?

Ni den ma ladon konuman, k'a lamo konuman, a bε lafu, a bε bana, a bε tunun bələn kōnō, a bε tunun dijε kōnō.

A bε f'o den suguya ma: «karisa den». O y'a tijelen ye. N'a jεra, a bε f'a ma: «an den». A wolofa bε caya. A woloba bε caya. A kanubaga bε caya.

Otuma, an k'an jija k'an denw ladonko ne, k'u ladamuko ne. An t'o k'an yεrew ye, bawo, anw yεrew ye batige ka ban. An b'o ke denw de ye, minnu y'an yεrew ani jamana bεe lajelen jigiw ye.

Few min ye kalanbliya dibi kεleli ye, musow ka kan k'u cεsiri ola, kun kelen dɔrɔn kama. Oye kun jumen ye?

O ye cε kalannaw cayali ye, jamana kōnō, ka temen muso kalannaw kan.

Nin yε dabaliban koye ! Mali musow dønnen bε n'u ka cεsiri, n'u ka timinandiya ye cogo min na, n'a fo. ko kabini balikukalanko daminera, olu ma se ka kun cew la, o tε ben mogo ma, min b'u døn.

Tijε don, muso ka baara ka ca. Tile kōnō, muso bε gadala, a bε kɔlɔndala, a bε finikola, a bε sugila, a bε baarayɔrɔ, a bε kɔljɔyɔrɔ, a bε denkundi la, a bε dɔgɔsanɔrɔ, wali dɔgɔniniyɔrɔ, a bε nakɔsεnε wali forosεnε la, a bε sinaya, wali ballimamu juguya la, nka, musoya tε ne sεgen kɔde ! Sanko sεgen min b'a hakili dayεlε, k'a d'a kan, balikukan bε mogo son hakili juman na.